

Служба святителю Нектарію, митрополиту Пентапольскому, Эгинскому чудотворцу

ВЕЧЕР

На Господи, возвах: стихиры, глас 6.

Подобен: Трдневен:

Троицы служитель истиннейший,/ заветов богомудрых отец ревнитель,/ Православия страж неусыпный явился еси,/ достоблаженне отче Нектарие;/ моли убо ныне,/ в небесных кровех водворяясь,// о иже на земли верно чтущих память твою.

Велия скорби и напасти,/ клеветы и озлобления/ в земнем житии твоём претерпел еси,/ отче Нектарие преподобне;/ темже и ныне, праведне,/ Троице Единосущней на небеси предстоя,/ можещи и нам, нападствуемым,// от бед и обстояний лютых избавление испросити.

В тяжцем недуге и мучительном,/ Христу спострадати вожделев,/ течение твое скончал еси, святителю славне;/ темже и ныне благодать имаши,/ от болезней и язв телесных// страждущим и недугующим исцеление подавати.

Слава, глас и подобен тойже:

В преставлении твоём, отче Нектарие,/ скорбь велия и печаль горькая/ сердца и души чад твоих объят./ Обаче ныне, иерарше приснопамятный,/ молитвою твоею благодерзновенною/ всякия неутешимыя скорби и печали// всех любящих тя верно избавляеши.

На стиховне стихиры, глас 6:

Архиереев доброе правило,/ добродетели преизящный наставниче,/ монашествующих утверждение, славо и похвало,/ Нектарие блаженнейший,/ Христов друже искреннейший,/ к Тому же верный предстатель буди// о верою и любовию совершающих память твою.

Любве Божественныя источник явился еси,/ пастырю кроткий и добрый,/ нектар словес богоглаголивых источил еси,/ Эгины пресветлое украшение,/ Пентаполя светильниче превеликий,/ моли Господа Премилосердаго/ о всех, с благоговением, усердием и верою// чтущих славную память твою.

Благодати Божия приятелище,/ сокровище даров духовных,/ чудес пучино неисчерпаемая,/ ангельски на земли пожил еси,/ Нектарие, архиерею досточудный,/ Христу во смирении подражателю,/ Того моли со умилением/ о всех выну почитающих// преславную память твою.

Слава, глас тойже:

Божия Матере чтитель всеусерднейший/ и Тоя угодник изряднейший,/ святителю Христов Нектарие,/ от юности твоя пребыл еси./ Кто моления твоя к Той исчислит?/ Кто воздыхания и слезы изочтет?/ О Невесто Невестная! – непрестанно к Ней зывал еси./ Темже и ныне молитв твоих Скоропослушницу// моли спастися душам нашим.

Тропарь, глас 1:

Силіврии отрасль и Эгины хранителя,/ в последняя лета явльшагося,/ добродетели друга искреняго,/ Нектария почтим, вернии,/ яко Божественнаго служителя Христова:/ точит бо цельбы многоразличныя благочестно вопиющим:/ слава прославленному ты Христу,/ слава Давшему ти чудес благодать,// слава Действующему тобою всем исцеления.

По первой стихологии седален, глас 6:

Егда Божественное желание найде на тя, отче Нектарие,/ мир и яже в нем сущая
нивочтоже вменил еси,/ образ терпения, смирения и послушания всем показал еси,
выну в молитве сокрушенной Господеви предстоя,/ егоже ныне о мире всего мира моли//
и о еже любовию почитающих тя.

По второй стихологии седален, глас 6:

Чистоты сердечныя усердно возжелев,/ Богу в жертву угодную сам себе принесл еси,
святителю,/ яко злато в горниле злостраданий искушен был еси,/ очистити тако Господу
тя изволившу;/ предстоя и ныне Владыце всех,// руце преподобней к Нему о людех
твоих воздеваеши.

По полиелеи седален, глас 4:

Премудрости Божественныя любитель истинный показался еси,/ от юности вышних
взыскав и горняя мудрствовати вожделев,/ отче святителю Нектарие,/ сего ради велиих
даров от Господа славы сподобился еси:/ таин сердечных прозрения, чудес дивных
творения,/ душ же и телес врачевания./ Темже, архиерею Божий, молися присно ко
Владыце Христу/ сподобитися грехов оставления// верою и любовию благочестно тя
славящим.

Стихира по 50-м псалме, глас 6:

Архиереев Богодухновенное украшение,/ богословия приснотекущий источник явился
еси,/ образ смирения и кротости в житии твоём показал еси,/ себе яко персть от земли
выну вмения,/ темже от Христа, смиреннаго и кроткаго сердцем,/ чудотворений
неисчетных дарования сподобивыйся,/ отче Нектарие преподобне,/ источаеши всем в
болезнях и недужех сущим// исцелений токи неоскудевающия.

Канон святителя, глас 2, егоже краегранесие:

О Нектарие, дивно прославился еси.

Песнь 1

Ирмос: Во глубине постла иногда/ фараонитское всевоинство преоруженная сила,
воплощшееся же Слово всезлобный грех потребило есть:/ препрославленный Господь//
славно бо прославися.

От юности весь Богу возложен, отрасль рода благочестиваго, Нектарие, иерарше
блаженнейший, чтитель Премудрости Божественныя и познания Ея рачитель явился
еси, учением неленостным сердце и ум просветив.

Наук духовных, еже по благочестию, взыскуя, Царьграда достигнути потщился еси,
добрейший во отроцех. Сего ради дом отца твоего оставивый, ярем трудов тяжких
понесл еси, Нектарие, и нищету, и глад, и скорби терпя, и все упование на Господа
возлагая.

Егда же скудость во всем тя стесни, ниоткуду же помощи человеческия обретая, рекл
еси в сердце своем, отроча смиреннейшее: Господу о скорбех моих письмо напишу, и
Той, призвав на смиренныя глаголы, избавит раба Своего от всякия печали.

Како люблю Его, весть мой Господь, – тако в сердце своем помышляя, Нектарие, дитя
по всему быв души простотою, Господу Иисусу, Сладчайшему Христу, на Небеса
письмо посла и абие помощь обрете от Него и нүжды всякия избавление.

Богородичен: Воспоим, вернии, песенно Деву Пречистую Богородицу, Превысшую небес и Ангельских Сил Преславнейшую, Божественными лучами Сына Своего светозарно осиянную, радостными гласы Той взывающе: молитвами предивнаго угодника Твоего Нектария помилуй нас и спаси души наша, предстательствующи присно, Богородице, о рабех Твоих.

Песнь 3

Ирмос: Процвела есть пустыня, яко крин, Господи,/ языческая неплодящая Церковь,/ пришествием Твоим, // в нейже утвердися мое сердце.

Таково от юности житие твое бысть, Нектарие, якоже ни единыя сласти мирския возлюбил еси, но все сердце твое яко жертву чистую и благоугодную Христу Господу принесл еси, Того заповедей и речений послушатель и исполнитель пребыв всеобразно.

Ангельскаго жития всею душею и сердцем возжелев, во обитель Нѣа Моні достигл еси, святе, и тамо образ монашеский восприяв, иго послушания благое на рамена возложил еси, хотения своего оттоле отнюд не обретая.

Радости весь исполняяся, праведне, троицу добродетелей стяжав, в молитве, бдении и пощении Троицы добрый служитель пребыл еси; житие во дворех Господних всею душею возлюбив, сердцем выну Создателю Богу песнь воспевал еси.

Богородичен: Пречистая Дево, Ангельских Сил Превышшая, всех Небесных Воинств Честнейшая Владычице, Тя едину имама Заступницу и Ходатаицу спасения нашего, се и ныне предстани, Всесвятая, и спаси души наша.

Седален, глас 4:

Исцелений обильно токи источающа, в скорбех помощника предивнаго, Нектария присноблаженнаго, вернии, восхвалим и к нему духовно празднующе возопиим: молися о нас прилежно, святителю, ко Владычице, Юже в житии твоём всеусердно возлюбил еси.

Песнь 4

Ирмос: Пришел еси от Девы не ходатай, ни Ангел,/ но Сам, Господи, воплощся,/ и спасл еси всего мя, человека./ Тем зову Те: // слава силе Твоей, Господи.

Истиннейший богослов, ум и сердце очистив, был еси, Нектарие, словес духовных нектаром сладчайшим наслаждаяся, темже и пастырь добрый и архипастырь предивный явился еси, отче святыи.

Егда ты, иерарше пречудный, великаго во святителех Николая храм во граде Каире боголепно обновил еси, той сам тебе в видении сна представ, целование братолюбное преподаде и благодарения слово теплое рече, о немже ты велию радость возымев, в ликовании Бога прославил еси.

Душею убо выну Престолу горнему предстоя, разумом же во глубину смирения нисходя, на престол святительства возведен был еси, Нектарие, митрополии Пентапольския украшение и чад Христовых пастырю истиннейший.

Богородичен: Величаем Тя, Надежду праотцев, пророков Исполнение, Матерь Божию, всяческих Господа неизреченно рождшую: радуйся, ликов девичьих Радосте, радость подаждь нам страстей лютых избавления.

Песнь 5

Ирмос: Посвещение во тме лежащих,/ спасение отчаянных, Христе, Спасе мой,/ к Тебе утренюю, Царю мира,/ просвети мя сиянием Твоим,// иного бо, разве Тебе, бога не знаю.

Изрядно любосмиранным нравом украшен, глагола еси в сердце своем, отче Нектарие: кто есмь аз, саном почтен святительским? Во смирении и кротости по долгу первым ми подобает быти, отонудуже последний есмь.

Во иерарсех славнейший, исполнь благодати и любве Христовы, паствы любовь стяжал еси, отче праведный, свет быв для нас житием и учением, мрак страстей далече отгоняющий.

Небесному Владыце и Господу во всем послушлив был еси, святителю, Тому Единому работати пламенно вожделев, хотения же своего всецело совлекшеся, стяжал еси жизнь нестареемую, всеблаженне.

Богородичен: Радуйся, Мати Чистая, страждущих Пристанище, радуйся, Боготканый Покрове, ширший облака, и Горних Сил Радосте неисчерпаемая, к Тебе, яко утешению спасительному, прибегаем: О Всепетая Владычице, изми рабов Твоих от бед и лютых обстояний.

Песнь 6

Ирмос: В бездне греховней валяясь,/ неизследную милосердия Твоего призываю бездну:// от тли, Боже, мя возведи.

Отче блаженне, апостольских речений истина в житии твоём верно оправдася: вси бо, хотящи благочестно жити о Христе Иисусе, гоними будут, темже и ты, гонения скорбь терпя, святые, неослабне на небо очи своего сердца возводил еси.

Пламенем жегомый молитв твоих, отче, враг наш и лжец исконный и завистник, клевет волны и укоров тягчайших противу тебе искаше воздвигнути. Ты же, кротчайший, благодушественно поношения терпя, точию на небесное воздаяние взираше радуясь.

Ради любве Христовы и ревности божественныя, любоболезненно гонений, Нектарие, скорбь претерпев, Богу безумия в сердце не дал еси, но выну Того единого благодарственно славляше.

Богородичен: Немошных Покров и Заступницу восхвалим днесь, вернии, поющи величия Тоя любовию: о Дево Всенепорочная, мольбами Твоими да уллучим, Пречистая, Божественную милость из Тебе неизреченно воплощенного Сына Божия.

Кондак, глас 4:

От юности игу благому Христову подклонивыйся,/ житием воистину добродетельным просиял еси,/ Силам Небесным в молитве непрестанней подражателю,/ ищущим спасения пастырю и споборниче добрый;/ в Божественных учениях свыше наставленный,/ во святителех богомудрейший явился еси,/ темже с любовию тебе вопием:/ радуйся, Нектарие,// Эгины велия похвало и украшение.

Икос:

Радости духовныя днесь исполняется людей благочестивых собрание в памяти угодника Христова предивнаго Нектария, митрополии Пентапольския вернаго предстоятеля, всего мира концы чудесы своими просветившаго и доселе токи исцелений недужным присно источающаго, воистину бо всем, имя его в молитве призывающим, помощник скорый и в скорбех сущим утешитель теплейший является. Темже и мы со умилением зовем: радуйся, Нектарие, Эгины велия похвало и украшение.

Песнь 7

Ирмос: Образу златому на поле Деире служиму,/ трие Твои отроцы небрегоша безбожнаго веления,/ посреде же огня ввержени, орошаеми, пояху :// благословен еси, Боже отец паших.

Отче Нектарие досточудне, благодать Божественная излися во устнах твоих, темже и юным наставник премудрейший явился еси, богословию истинному тех тайнонаучая, от благаго сокровища сердца своего благая износя.

Слава твоя, таинника Божия, дивно умножися, угодниче Христов Нектарие, темже и всем познати Того ищущим добрый путеводитель обрелся еси, святе, путем превосходнейшим ходити заповедей Божественных верно наставляющий.

Любитель безмолвия и жития уединеннаго быв, боголюбиве отче Нектарие, лик дев честных в словесное стадо свое собрал и тех яко пастырь добрый премудре упасл еси, Триединому истинному Богу работати научая.

Афины богоначертанно оставив, святителю, на острове Эгине вселяешися, и тамо обитель в честь Пресвятыя Троицы устроив и благолепно тую украсив, лик пресветлый дев невестоводительствуеши ко Христу, путь ко спасению тем верно показуя.

Богородичен: Воспеваем Тя, Священную и Непорочную Владычицу, яко Покров боготканый сущим в скорбех явилася еси и светом девства Твоего, Нескверная, просветила еси вся зовущия: благословен еси, Боже отец наших.

Песнь 8

Ирмос: В пещь огненную ко отроком еврейским снизшедшаго/ и пламень в росу преложшаго Бога/ пойте, дела, яко Господа// и превозносите во вся веки.

Воистину и отец добрейший, и учитель молитвы изряднейший явился еси, святителю, чадом твоим, во обитель Святыя Троицы собраным, ихже видя добродетельми облекшихся, благодарно Богу всем сердцем взывал еси: благословите, вся дела Господня, Господа.

Имея смирение неложное, в трудах неленостных, отче, пребывал еси. Темже и людие тя зряще посреде всех яко служащаго, недоумевахуся, глаголюще: кто есть сей? Но абие познав тя, истиннаго архиерея Божия, верою воспеваху: благословите, вся дела Господня, Господа.

Людем утешитель и помощник добрейший показался еси, отче Нектарие, и в чудотворцех изряднейший, яко землю безводную молитвою твоею одожди и сети рыбаей в ловлении чудно исполни, пищу же во обители своей умножи неоскудно, предивне, о всех сих непрестанно воспевая: благословите, вся дела Господня, Господа.

Силам Небесным в чистоте поревновал еси, отче Нектарие, темже и в молении, аще и плоть носяй, со Ангелы возносился еси, на воздухе стоя, отонудуже паче смирения исполняяся, воспевал еси: благословите, вся дела Господня, Господа.

Богородичен: Ходатаица буди нам, человекоев спасение, с сокрушенным сердцем Тебе припадающим, Мати Божия: Тя бо всему роду нашему Божественную показала Предстательницу Сын Твой, Дево, егоже превозносим во вся веки.

Песнь 9

Ирмос: Безначальна Родителя Сын, Бог и Господь,/ воплощся от Девы, нам явися,/ омраченная просветити, собрати расточенная.// Тем Всепетую Богородицу величаем.

Якоже страдалец мужественнейший, отче Нектарие, огонь Божественныя любви в души нося, тяжкую болезнь благопокорливо претерпевал еси, никомуже о сем открывая, час же исхода своего предзрев, слезно воздыхал еси: Господи, да будет о мне воля Твоя!

Егда кончина твоя приспе, святителю праведнейший, в руце Божии душу кротко предал еси, но абие прослави тя Господь, Его в житии прославльшаго, и мужа разслаблена, внезапно одежд твоих коснувшася, здрава и цела востави.

Скорбь и печаль по преставлении твоём, иерарше, души исполниша любящих тя, обаче рыдающим им в видениях дивных являясь, яко наследник беспечальныя жизни, на веселие горе и плач преложил еси.

Исцеления присно совершает гроб твой, благоухания мира источающий, отче Нектарие блаженнейший, темже по всей вселенной людем присно скорый помощник и врач преискусный являешься, Божественных чудес сияньми просвещая мира концы.

Богородичен: Блажим Тя вси роди, Дево Чистая, радость всему миру присно подающая: виновница вечныя радости буди нам, Владычице, яко да в тишине сердца с лики Ангельскими песнословим Тя: радуйся, Невесто Невестная.

Светилен:

Прославлено на Эгине прешед житие, в небесных чертозех вселился еси, святе, Царя Славы, обаче духом любви твоя от нас не отступивый, и ныне наставник добрый пути ко спасению нам являешься, недуги исцеляеши, в скорбех утешаеши: темже вси молим тя, отче Нектарие, уврачуй ны благоприятными твоими молитвами, верою почитающих память твою.

На хвалитех стихиры, глас 1.

Подобен: Небесных чинов:

Духовных добродетелей вместилище пречудное,/ отче Нектарие преблаженне,/ небесныя красоты любитель явился еси,/ молитвы непрестанной рачитель пребыв,/ и ныне смиренно молим тя:// тебе припадающих тепле в молитвах помяни.

Помощника во всем мире превелика/ Творец ты показа, Нектарие,/ святая хотения Божия исполнившаго,/ темже и благодать врачевания приявшаго;/ и нас достигни, милостиве,// усердным твоим ходатайством.

Наставниче предобрый Нектарие,/ якоже твердое кормило Церкви,/ пути спасительному наставил еси/ взыскующих спасения истиннаго,/ и ныне Царствию Славы приобщивыйся,// управи ко спасению живот наш.

Слава, глас и подобен тойже:

О иерарше праведный!/ Таинственно извести тя Господь,/ яко день отшествия твоего наста/ и время преселения приближися,/ обаче слезно припадал еси ко Владычице,/ скорбя о чадах своих оставляемых:/ не остави их, Пречистая.

На литургии вся служба святителю.

Святителю Нектарию, митрополиту Пентапольскому, Эгинскому чудотворцу
(тропари и молитвы)

Тропарь, глас 4:

Преподобнически пожив, яко мудрый иерарх, / прославил еси
Господа / добродетельным житием, Нектарие преподобне. / Темже,
Утешителя прославлен силою, / Божественными мощми твоими, /
демоны отгониши и болящия исцеляеши, // верою приходящия ти.

Ин тропарь, глас 1:

Силиврии отрасль и Эгины хранителя, в последняя лета явльшагося,
добродетели друга искреняго, Нектария почтим вернии, яко
божественнаго служителя Христова: точит бо цельбы
многоразличныя благочестно вопиющим: слава прославльшему тя
Христу, слава давшему ти чудес благодать, слава действующему
тобою всем исцеления.

Молитва

О, преславная главо, святителю отче Нектарие, архиерее Божий! Ты
во времена нечестиваго отступления, мир пленившаго, благочестием
просиял еси, главу прегордаго денницы, уязвляющаго нас, сокрушил
еси и верный служитель Христа Бога показался еси, Иже дарова ти
благодать язвы телесныя исцеляти и недуги душевныя врачевати.
Темже, яко имаши дерзновение ко Господу, моли Его, да помилует
нас по велицей Своей милости, прелести бесовския избавит,
болезней свободит и Царствия Небеснаго сподобит со всеми
святыми, идеже вкупе с тобою сподобимся прославляти имя
Пресвятыя Троицы, Отца и Сына и Святаго Духа ныне и присно и во
веки веков. Аминь.

*Текст молитвы святителю Нектарию Эгинскому, митрополиту Пентапольскому,
чудотворцу, утвержден к общецерковному богослужебному употреблению решением
Священного Синода от 17 июня 2021 года (журнал № 34).*

Молитва иная, первая

О, мироточивая главо, святителю Нектарие, архиерее Божий! Во
времена великаго отступления, нечестию мир пленившу,
благочестием просиял еси и главу прегордаго Денницы, уязвляющаго
нас, сокрушил еси. Сего ради дарова ти Христос врачевати язвы
неисцельны, за беззакония наша нас поразившия. Веруем: возлюбй
тя Бог праведнаго, да тебе ради нас, грешных, помилует, от клятвы
разрешит, от недуг избавит, и по всей вселенней страшно и славно
будет имя Его, Отца и Сына и Святаго Духа, ныне и присно и во веки
веков. Аминь.

О великий угодниче Христов, святителю отче Нектарие, митрополии
Пентапольския похвало и украшение, Эгины предивный чудотворче!
От юности Божественною любовью уязвився, все желание твое ко
единому Владыце Христу простре, темже и благодать Святаго Духа
всякую страсть в сердце твоем попали и душу твою храм чист и
совершен Святыя Троицы содела, уста же твоя сладчайшаго нектара
словес Божиих исполни неоскудно. Обаче яко служитель
истиннейший Христов, скорбь и гонения претерпел еси, клеветою и
злобою человеческою, якоже многоценное золото в горниле, искушен
и очищен быв, светлейше всякаго золота ныне Престолу Всецаря и
Господа предстоиши, моляся со умилением о всяцей души
христианстей, в болезни и печали тя призывающей.

Молитва иная, вторая

Услыши убо и нас, недостойных чад твоих, с сокрушением сердечным ко благодати твоей припадающих, помощи и заступления от тебе присно взыскующих. Призри, угодниче предивный Христов, на нужды наша и Твоим благоприятным ходатайством скоро посети и умоли Пресвятую Троицу мир вселенной даровати, от глада и пагубы люди христоименитыя благосердно избавити, страждущих язвы и недужи тяжкия милостивно исцелити, в нечестии погибающия к познанию истины и покаянию обратити, верныя же в вере утвердити и укрепити и вся, яже ко спасению потребная, всем даровати.

Наипаче же, святителю отче Нектарие, потщися умолити Владыку Христа, да не лишит нас милости Своея богатая в день Страшнаго Суда Своего, части шуия всяко да избавит, части же десныя и Царствия Небеснаго милостивно да сподобит, идеже в радости неизреченней немолчными гласы да славим Его со Безначальным Его Отцем, и Пресвятым и Благим и Животворящим Его Духом, Троицу Единосущную и Нераздельную, во веки веков. Аминь.

Молитва иная, третья

О, святителю Нектарие, отче Богомудрый! Приими, блюстителю веры православныя, исповедание устен людей христоименитых, собранных днесь в храме благодатию Божиею, в тебе живущею. Весть бо достиже до предел Российских, яко ты, велий во святых угодниче Христов, во всех концех вселенныя призывающим имя твое являешия и от раковыя болезни исцеление даруеши. Слышахом об иерее, тебе тезоименитом и храм во имя твое созидавшем со скорбьми велиими. Раковою убо язвою грудною поражен бе, крови на всяк день точащейся, и страждаше люте, дела же своего святого не оставляше. Внезапу ты, святителю многомилостиво, с Небес сшед, ему во храме предстал еси в видимом образе. Он же непсуща тя собрата едина от смертных быти, прошаше молитв твоих и рече: «Боляй есмь вельми, обаче хочу святой олтарь наздати, да поне единожды святую Литургию вкупе с прихожаны совершу; послэжде и умрети готов есмь, смерть бо мя не страшит». Ты же, отче, безплотен сый, слезами лице свое орошаше! и объем страдальца, лобызаше и глаголя: «Не тужи, чадо мое, яко, болезнию испытан, здрав будеши. Все убо о чудеси сем ведати имут». Он же, исцелен быв, абие разуме, с кем беседоваше, тебе невидиму бывшу. О, великий угодниче Христов Нектарие! Храм оный свершен есть ныне, и чудеса твой аки море преизливающея умножишася! Мы же познахом, яко молитве праведника должно поспешествуемой быти усердием нашим к службе Божией и решимостью за Христа умирати, да здрави обрящемся. Молят тя, отче праведный, болящая чада твоя: да совершается с нами воля Божия, благая, угодная и совершенная, не хотящи смерти грешнику, но еже обратитися и живу быти ему. Ты же, провозвестниче воли Божией, исцели ны благодатным явлением своим, да велик будет Бог на Небеси и на земли во веки веков! Аминь

**Святитель Нектарий Пентапольский Молитва Божией Матери
(общеизвестный вариант перевода молитвы «Агни Парфене»)**

Марие, Дево Чистая, Пресвятая Богородице,
Царице, Мати Дево, Руно, всех покрывающее,
Превысшая Небесных Сил, нетварное сияние,
Ликов девичьих Радосте и Ангелов Превысшая,
Небес Честная Сило и Свете, паче всех светов,
Честнейшая Владычице всех Небесных Воинств,
Всех праотцев Надеждо, пророков Исполнение,
В подвизех Ты помощи, Кивоте Бога Слова,
И девам Ликование, и матерем Отрадо,
Целомудрия Наставнице, душ наших Очищение,
Покрове ширший облака и страждущих Пристанище,
Немощных Покров и Заступнице, Надеждо ненадежных,
Марие, Мати Христа, Истинного Бога,
Ааронов Жезле прозябший, Сосуде тихой радости,
Всех сирых и вдов Утешение, в бедах и скорбех Помоще,
Священная и Непорочная Владычице Всепетая,
Приклони ко мне милосердие Божественного Сына,
Ходатайце спасения, припадая, взываю Ти:
Радуйся, Невесто Невестная.